

鞏縣志卷之六

鞏縣知事李述武纂修

風俗志

百里不同風千里不同俗地使然也鞏爲河山奧區土性龐厚淳茂之氣鍾焉士大夫多居深山孝悌力田以禮讓教其子孫足跡不入城闔民勤其業無咎窳媿生無浮華相競有成周邳隆之風然習尙之澆漓一人唱之則百人和之杜漸防微是在長吏矣志風俗

元日味爽設祭品禮神燔栢木儺逐尊卑以次相拜奉祀先人上元節火樹鰲山照耀如晝老幼男女分道遊觀長幼以序十

四至十六三夜皆燃燈十九日爲添倉亦燃燈祀神祀先人

二月二日名龍擡頭敲梁除蝎

寒食節拜掃先塋封土祭奠

清明節遍插柳枝祀青苗牛王洪山諸神

三月三日臨流會飲祓除不祥

穀雨節畫符禁蝎至十三日爲玉仙社俗傳玉仙司上天風雨

故歲爲水社城市村舍皆合聚登山製爲旛幢旗幟侍從儀衛若王者然十八日爲中岳社其祀禮與水社同

四月八日爲廬醫社士民爭爲祭享病者尤先守土官詣祠告虔爲民求福

五月五日角黍蒲觴囊香佩艾綵縷繩絲相餽餉薦新麥於家廟

六月初一日爲城隍社奔走祭享合縣皆至

七夕具花菓浮針乞巧十五日祀其先或塋或室設麻穀苗穗

八月中秋日以瓜菓月餅祭月祀先人亦相餽會飲

九月重陽日攜酒登高作餠餅相餉

十月一日祀先以五色紙剪爲服被焚之謂之送寒衣

長至日禮神祀先拜尊長

臘八日合米豆菓蔬煮粥祀先人二十三日掃舍祭竈祀先除

夕易門神更桃符貼宜春字焚紙家廟會飲守歲

〔施府志〕鞏縣土厚水深人性勇敢負氣尙力然禮俗多行

古道